



 Glygge-Zyttig vo de
JOKER WAGGIS

Usgoob 9 - im Hoornig 2016

Volle Ysatz

Lägerlibagge 2016 SYTTE 3



Unter der Lupe

Der Michi SYTTE 2



Basler Fasnacht 2016

S'Programm stoot SYTTE 3



Sicherheit - bi uns e grosses Thema!

Sicherheit isch e seer wichtigi Sach - zwiifellos! Us däm Grund hän d'JOKER WAGGIS syt em allererschte Cortège wirgglig alles unternoo, zem sicher kenne Fasnacht mache. Und esoo isch das bis hit! Doch mit Sicherheit ka me's au iiberdriibe ...



E neue Draggdoor, e neui Rundum-Verschaalig - und dermit d'Sicherheit no aimol erheet!

Bevor iiberhaupt e Betriibs-Sicherheits-Beschyynigung (kurz: BeSiBe) obligatorisch worde isch, hän d'JOKER WAGGIS scho e speziells Augermergg uff die drin verlangte Pinggt gworfe.

Het me friener e weeneli die andere Waggiswäage und Draggdoore am Cortège beobachtet, isch doch die aint oder ander Glygge uffgfallene, wo me nit grad als sicher het kenne bezaichne. Us däm Grund isch d'Yyfierig vo der BeSiBe nit mee als logisch gsi.

Laider hän die strängere Massname deertmols uff Grund vom ene draagische Unfall miesse yygiert wärde. Au wenn dää Unfall nit uff mangelndi Sicherheit zruug z'fiere gsi isch, het e Veränderig miesse statt finde.

So wird hit jeeder Waageglygge e greessers Mass an Sicherheit und Reegle vorgschriibe. Wie erwänt, isch das fir d'JOKER WAGGIS aber

no nie e Problem gsi. Und doch het me sich zur wytere Verbessering uff d'Fasnacht 2014 e neue Waage zuegleegt. Wobby d'Sicherheit vo Aafang aa e no zentraaleri Rolle gspiilt het, denn der neu Uffbau isch



Lichtbau: Aluminium, Droot, driiber no unseri Blache. Ainzig d'Front isch us Holz bliibe ... fir mee Sicherheit.

nach de allerneuschte Reegle und Bestimmig konzipiert worde.

Aber au d'Vorliebe und Wansch vo de JOKER WAGGIS sin bi däm neue Uffbau beruggsichtigt worde. So het der neu Waage uff baide Sytte e knapp 3 Meter brait Trappe gha, dermit s'Uff- und Abstiige no aifacher gsi isch. Fir die Aggtive vo

WYTER SYTTE 2

FORTSETZIG

de JOKER WAGGIS isch doo dermit e langjeerige Draum in Erfüllig gange. Het me doch so allewyyl unyygschränggte Zuegang bim Intrigiere mit em Volgg am Stroosserand gha. Und so isch au bi de maischte Schauluschtige die speziell Art Waage super aakoo.

Mit dääre Erkenntnis hän sich d'JOKER WAGGIS e Joor speeter nomol fir e äänlige Uffbau entschiide. Am Fasnachts-Mäntig am Wettstaiplatz isch me wiider esoo uff d'Route gange und het aimol mee s'Volgg begaischteret.

Am Fasnachts-Mittwuch hän sich d'JOKER WAGGIS denn nomol am



Die neu heeeverstellbari Halterig vo der Draggdoor-Verschaalig - aifach & genial.

Wettstaiplatz uff der Cortège vorbereitet, wo kurz vor 13:30 Uhr d'BeSiBe-Kontrolle vo der Basler Bolizey bim Waage verbyy koo isch. Wie iiblig sin d'Dokumänt prieft und bim Faarer kurz e Alkoholtescht

duuregfiert worde ... aber nadyrlig isch wiider emol alles in Oornig gsi! D'JOKER WAGGIS hän scho uff d'Route welle, doo isch no e letschi Noochfroog ko: "Wie schitzet lir Euch denn vor em Abefalle?"

Was sich wie e schlächte Scheerz aagheert het, isch aber Ärnst gsi. Denn daatsächlich mien Waggis uff eme Waage neu vor em Abefalle gschitzt syy.

Nach ainige Diskussioone hän d'JOKER WAGGIS aber doch no uff d'Route kenne. Uff d'Fasnacht 2016 hän aber gwissi bauligi Massname miesse vorgno wärde.

Blibt aber doch ai Froog - isch d' Fasnacht esoo wirgglig sicherer?!?

Unter der Lupe: Der Michi

In dääre Rubrigg wird allewyyl ai JOKER genauer voorgstellt. Diesmol näme miir der Michi unter d'Lupe.

72stunde: Wie alt bisch Du?

Michi: Bi grad kirzlig 28 worde.

72stunde: Wo bisch Du dihim?

Michi: Im Glabasel.

72stunde: Was machsch brueflig?

Michi: Mii Leer ha ich als Meebelschryyner gmacht.

Aber momentan mach ich no der aidgenessisch Abschluss zem Projägglaiter.

72stunde: Was machsch Du in Diiner Freizyt?

Michi: Usser Fasnacht ha ich no wyteri Hobbys - ich spiil Dart in der C-Liga, in eme Mittelalterheerlager bi ich aggtiv und sitz no im Vorstand vo der Rhybundstiftig.

72stunde: Syt wenn bisch Du bi de JOKER WAGGIS?

Michi: Also offiziell syt der Fasnacht 2013. Doch mii Vorgschicht goot no e weeneli wyter zrugg ...



72stunde: Wie bisch Du denn zue de JOKER WAGGIS gstoosse?

Michi: Ich ha scho wäärend de Fasnachte 2011 und 2012 bi de JOKER WAGGIS im Vordraab mitmache deerfe. Bi deertmols vom Stephan aagfroogt worde - iin ha ich ebbe scho vom Dartverain kennt. Und so bi ich wiider ins Gspreech ko, wo kurzfristig e Platz uff em Waggiswaage frei worde isch.

72stunde: Was isch Dii spezielli Funggzioon bi de JOKER WAGGIS?

Michi: Ich bi der Mat-Ueli (Material-Wart) vo der Glygge. Und nachdäm ich als Uffnaam-Ritual bi de JOKER WAGGIS fir alli ha miesse koche - und will's schyyns gschmeegt het - bi ich grad no zem Glygge-Koch ernennt worde.

72stunde: Weeles isch Dii bishär scheenschts Erläänbis mit de JOKER WAGGIS?

Michi: Mii scheenschts Erläänbis mit de JOKER WAGGIS isch gsi, wo ich s'erschte Mol als Waggis uff em Waggiswaage ha deerfe stoo. Das isch e Draum gsi vo miir, syt ich e glaine Binggis gsi bi ...

72stunde: Was sin Diini Winsch fir d'Zuekunft bi de JOKER WAGGIS?

Michi: Ich winsch miir, fir s'Joor 2017 e bombe Jubiläum uff d'Bai stelle z'kenne. Und das miir zämme no e mänggs Joor kenne Fasnacht mache.

Usserdäm wär's no scheen, wenn miir s'Dach vo unserer Garage im näggschte Summer sowyt dicht griegte, dass unsere Waage ändlig nimme miesst zuedeggt wärde nach jeedem Waagebau!



Guetschyyn

Geege Abgoob vo däm Guetschyyn an unserer **JOKER BAR** an der Muttenzer Fasnacht 2016 griegsch Du e Willkommens-Dringg nach Waal gratis!



Name: _____

Vorschau Basler Fasnacht 2016 - s'Programm vo de JOKER WAGGIS

Au in dääre Usgoob vom **72stunde** git's wiider unsere Fasnachts-Fierer. Mit em neu gestaltete Routeplan hän unseri Familie, Frinde, Fans oder Passiv-Mitglieder an der Fasnacht 2016 zuedäm no aifacher d'Meegligkait, uns JOKER WAGGIS live z'erlääbe ...

Fasnachts-Mäntig

13:30 Uhr

Start am Wettstaiplatz (1)

14:30 Uhr

1. Pause am Claraplatz (2)

15:00 Uhr

Wyter goot s ...

16:00 Uhr

2. Pause in der Staine (3)

16:30 Uhr

Wyter goot s ...

17:00 Uhr

3. Pause bim Banggverain (4)

17:30 Uhr

Wyter goot s ...

18:00 Uhr


Waageleere am Wettstaiplatz (1)

19:00 Uhr

Waage versoorge

23:00 Uhr

d'JOKER WAGGIS uff der Gass



Fasnachts-Zyschtig

14:30 Uhr

Start am Barfi (Stadtcasino)

18:00 Uhr

Ustusch Binggis- / Bar-Wäägeli

19:15 Uhr

Nachtässe am Rümelinsplatz

21:00 Uhr

Birsig-Sinfonie bi der Draischiiibe

23:30 Uhr

d'JOKER WAGGIS uff der Gass

Fasnachts-Mittwoch

13:30 Uhr

Start am Wettstaiplatz (5)

14:30 Uhr

1. Pause in der Freye Strooss (6)

15:00 Uhr

Wyter goot s ...

16:00 Uhr

2. Pause in der Utegass (7)

16:30 Uhr

Wyter goot s ...

17:15 Uhr

3. Pause bi der Mäss (8)

17:45 Uhr

Wyter goot s ...

18:00 Uhr

Waageleere am Wettstaiplatz (5)

19:00 Uhr

Waage versoorge

23:00 Uhr

d'JOKER WAGGIS uff der Gass

04:00 Uhr

d'JOKER WAGGIS am Ändstraich

Volle Ysatz fir unseri Läggerli

Allewyl zwai Wuche vor der Fasnacht isch es sowyt - der jeerlig Läggerli-Samschtig stoot aa!



JOKER WAGGIS leege sich ordentlich ins Ziig fir d'Läggerli

Wenn miir JOKER WAGGIS ai Tradizioon pflääge, denn isch das die vo de sälber gmachte Läggerli, wo miir an jeeder Fasnacht vom Waage verdaile.

Stolz sin miir doo derby nit numme, will miir aine vo de letschte Wääge sin, wo no Läggerli "im Agebot" hän. Sondern wool eenter, will miir unseri Läggerli wyterhii sälber mache kenne.

Doo derfir dräffe miir uns jeedes Joor zwai Wuche vor der Basler Fasnacht zem

Läggerli-Samschtig in der Beggerei Bischoff.

Unter der Laitig vom Werner Bischoff - em Inhaber vo der Beggerei - wird e Daag lang ai Blääch nach em andere in Oofe gschoobe.

Doch das isch erscht der Aafang. Dernooch folgt d'Glasuur und s'Schniide in handligi Dreyegg. Und im letschte Schritt wärde die fertige Läggerli denn einzeln verpaggt.

Der Uffwand isch also gross, aber es loont sich ainewäg ...